

## DOMINGU XXVIII TEMPU KOMÚN – TINAN A

### Tema

Liturjia Domingu XXVIII Tempu Komún nian deskreve mundu ksolok no domin rohan-laek ne'ebé Maromak hakarak oferese ba nia oan sira.

Iha *leitura dahuluk*, Isaías fó sai festa” han-hemu” boboot ne'ebé loron ida Maromak, iha nia uma rasik, sei oferese ba Povu hotu. Simu Maromak nia konvite no partisipa iha festa ne'e katak aseita moris iha komuñauñ ho Maromak. Husi komuñauñ ne'e sei rezulta, ba ema, ksolok totál, moris naresin.

*Evanjellu* sujere katak presiza “kaer” Maromak nia konvite. Interese no konkista sira mundu ne'e nian labele hadook ita husi Maromak nia dezafiu. Opsaun ne'ebé ita halo iha loron ita-nia batizmu nian la'ós “ko'aliaibun beek de'it”; maibé kompromisu sériu, ne'ebé tenke moris ho modu koerente.

Iha *leitura daruak*, Paulo apresenta mai ita ezemplu konkretu ida comunidade ida-nia ne'ebé aseita Na'i nia konvite no moris iha dinámika Reinu nian: comunidade sarani Filipos nian. Komunitade laran luak no solidária, haka'as an atu moris iha domin no fó sasin kona-ba Evanjellu iha ema sira-nia oin. Komunitade Filipos nian, mak loos duni, ezemplu ida ne'ebé comunidade sira Reinu nian tenke banati tuir.

### LEITURA I – Is 25,6-10a

Difisil liu atu situa tempu no momentu istóriu, testu leitura dahuluk domingu ne'e nian.

Ba ema balun, orákulu ne'e pertense ba faze finál profeta Isaías nia moris nian (sék. VIII mK nia rohan) bainhira, la kontente ho liurai sira Judá nian, profeta hahú mehi tempu foun ida ksolok no dame rohan-laek ba Maromak nia Povu.

Ba seluk, testu ne'e la pertense ba Isaías dahuluk (autór kap.1-39), maski integra iha nia livru. Testu ne'e husi época ikus ona ba profeta... Referénsia ba superasaun mate nian, mata-been no moe nian, bele sujere katak testu ne'e nia kompozisaun iha momentu istóriu pós-Ezíliu iha Babilónia, bainhira Judá konkista fali liberdade.

Testu ne'e uza ilas festa “han-hemu boboot”. Festa “han-hemu” iha ambiente sósiu-kulturál mundu bíbliku nian mak, momentu partilla nian, komuñauñ nian, konstituisaun comunidade meza nian, estabesimentu lasu familiár sira entre konviva sira.

Aleinde akontesimentu sosiál, festa han-hemu” iha mós dimensaun relijioza. “Han-hemu sagradu” sira selebra no habiit fiar-na'in nia komuñauñ ho Maromak, estabesimentu lasu familiár entre Maromak no fiar-na'in sira. Tanba ne'e mak, iha perspetiva katekista sira ne'ebé tau orden ba tradisaun sira kona-na Aliansa Sinai nian, kompromisu entre Jahwéh no Israel tenke taka ho refeisaun/han-hemu entre Maromak no representante sira Povu nian (kf. Ex 24,1-2. 9-11).

Signifikativu iha kampu ne'e, “sakrifísiu komuñauñ nia” (“zebâh shelamim”) selebra iha Templu Jerusalém nian. Iha selebrasaun relijioza tipu ida-ne'e, fiar-na'in lori ba Templu balada ida ba Maromak. Hasa'e tiha sakrifísiu, balada nia bokur uza atu sunu iha altár leten, nia na'an fali fahe malu entre ema ne'ebé oferese no amlulik sira. Oferese-na'in no nia família tenke han ninia parte iha espasu sagradu santuáriu nian. Halo nune'e, sira tuur iha meza ho Maromak, selebra ninia hola-parte ba sírkulu familiár Maromak nian no hafoun ho Nia lasu sira dame nian, armonia nian, komuñauñ nian (kf. Lv 3).

Ne'e mak ambiente ita-nia testu nian.

### *MENSAEJN*

Profeta haklaken katak Maromak, iha futuru ida laho data ne'ebé marka, sei oferese festa "han-hemu" boboot ida; no ba festa ne'e, Jahwéh konvida "povu hotu". Ne'e mak insiativa ida Maromak nian atu estabelese lasu "familia" nian ho umanidade tomak.

Fatin festa "han-hemu" mak "foho ne'e" (vers. 6) – evidentemente, foho Templu nian, iha Jerusalém, "Jahwéh nia uma", fatin iha-ne'ebé Maromak hela iha nia Povu nia leet, fatin Israel halo kultu ba Jahwéh no selebra sakrifíziu sira komuñau nian. Tan ne'e, aseia konvite Maromak nian ba "han-hemu" siginifika, partisipa iha kultu ba Jahwéh, hetan simun iha Jahwéh nia uma, tama iha "espasu íntimu" no familiár ho Maromak no tuur ho Nia iha meza. Iha festa "han-hemu" ne'e sei serve "hahán ho sabór", "hahán ho bokur di'ak", "tua di'ak liu" no "puru liu" (vers. 6). Espresaun sira subliña abundánsia moris nian – no vida ho kualidade – ne'ebé Maromak hakarak hakonu ninia konvidadu sira.

Ba sira ne'ebé aseita konvite ba festa "han-hemu" nian, sei hahú tempu foun ida, komuñau íntima ho Maromak no moris ne'ebé la nahas. Profeta sujere komuñau totál entre Maromak no ema sira ne'ebé sei hahú, nia indikasaun mak sei hasai tiha "véu ne'ebé taka povu hotu, hena ne'ebé falun hotu" (vers. 7) no impede kontaktu totál ho Maromak nia mundu. Husi parte seluk, profeta dehan katak iha inísiu tempu foun dame no ksolok nian Maromak sei harahun mate ba nafatin, sei hamaran "matan-been hotu husi oin sira" no sei halakon "moe" ne'ebé hatodan ninia Povu" (vers.8).

Festa "han-hemu" nian remata ho knananuk agradesimentu nian, karik fórmula ida uza bainhira foti liurai foun (vers. 9). Signifika katak, ho festa "han-hemu" ne'ebé Mesias oferese. Sei hahú Maromak nia ukun iha rai tomak.

Profeta, konserteza, ho ninia profesia ne'e deskreve hela tempu mesiániku sira. Iha profeta nia perspetiva, tempu foun mak tempu komuñau totál Maromak nian ho ema no ema nian ho Maromak. Husi intimidade entre Maromak ho ema, sei mosu ksolok totál, moris loos no nakonu ba ema.

Hahú husi ne'e, mak ideia festa "han-hemu mesiániku" sai korrente iha judaízmu.

## **LEITURA II – Filip 4,12-14.19-20**

Dala ida tan, leitura daruak oferese mai ita parte ida husi Paulo nia surat ba sarani sira Filipos nian.

Ita iha tinan 56/57. Paulo iha kadeia (Éfeso?) tanba Evanjellu. Iha momentu difisil nia vida apostóluka, Paulo simu ajuda ekonómika no, importante liu buat ne'e mak, prezensa solidária kuidadu Epafrodito nian, membru ida komunidade nian, ne'ebé komunidade haruka atu tulun Paulo no hatudu atensaun husi ninia "oan sira" husi Filipos.

Ita-nia testu hasai husi kapítulu finál Surat ba sarani sira iha Filipos. Ho ton emosaun nian, Paulo agradese ba don sira nia simu no ba solidariedade ne'ebé sarani sira Filipos nian hatudu ba nia.

### *MENSAJEN*

Paulo haksolok ba ajuda nia simu husi komunidade sarani Filipos nian. Paulo nia ksolok la'ós tanba solusaun ba ninia nesesidade materiál sira maibé, liuliu, ba signifikadu jestu Filipos oan sira-nian. Donativu ne'e mak sinál, la'ós de'it amizade nian ne'ebé komunidade hatudu ba Paulo, maibé mós sarani Filipos nia solidariedade ho anúnsiu Evanjellu Jezús nian: ho forma

ne'e, sarani sira Filipos nian manifesa sira-nia apoiu ba Paulo nia ministériu apostóliku no ba serbisu ne'ebé apóstolu dezenvolve atu Jezús nia proposta libertadora to'o ba ema sira. No ida-ne'e, bele haree momoos, halo Paulo nia fuan haksolok.

Ba nia an rasik, Paulo toman ona ho privasaun sira no ho frugalidade/ho sasán uitoan. Nia moris no nia misaun la depende ba komodidade materiál sira: nia hatene “moris iha pobreza” no hatene “moris iha abundánsia”... “Liberdade interiór” hasoru rikusoin sira nia hun mak Kristu: Kristu mak fó forsa ba apóstolu atu supera privasaun sira, anima nia iha momentu difikuldade nian, Nia mak fó barani atu enfrenta nesiedade sira ne'ebé vida apostólíka impoin.

Paulo iha serteza katak solidariedade no atensaun ne'ebé membru sira comunidade nian manifesta sei halo di'ak, uluknanai, ba sarani sira Filipos nian, basá Maromak sei selu ho laran-luak sira-nia jestu.

## **EVANJELLU – Mt 22,1-14**

Ita kontinua iha Jerusalém, laron ruma molok Páskua. Dirijente relijiozu judeu sira, metin iha sira nia serteza no seguransa, deside ona katak Jezús nia proposta la mai husi Maromak; tan ne'e sira rejenta tomak Reinu ne'ebé Nia haklaken.

Testu ohin nian halo parte ba bloku ida ho aikanoik tolu (kf. Mt 21,28-32. 33-43; 22,1-14), ho objetivu atu ilustra rekuza Israel nian ba Maromak nia salvasaun. Liuhusi aikanoik sira-ne'e, Jezús konvida opozitór sira – Líder relijiozu judaiku sira – atu rekoñese sira-nia taka-an iha eskema autosufisiénsia nian, orgullu nian, arrogánsia nian, prekonseitu sira nian, ne'ebé la husik sira loke fuan ba Maromak nia don sira. Ita-nia testu mak ida ikus husi aikanoik tolu.

Krítika testu nian hatudu katak Mateus tau hamutuk iha-ne'e aikanoik rua lahanesan: aikanoik konvidadu sira-nian ba “festa” (komún iha Mateus no Lucas, maski versaun rua iha diferenza – kf. Mt 22,1-10; Lc 14,15-24) no aikanoik konvidadu ne'ebé tama ba festa laho hatais festa nian (Mateus de'it mak iha – kf. Mt 22,11-14). Iha ninia orijinál, aikanoik rua ne'e iha hanorin lahanesan; maibé tema komún “festa han-hemu nian” halo sira besik no tau hamutuk tiha.

Konteúdu aikanoik ohin nian mak festa “han-hemu” nian. Ita hatene ona katak festa “han-hemu” iha kultura semita mak fatin enkontru nian, komuñaun nian, atu kria lasu familiár entre konviva sira. Aleinde ne'e, nia mós sai serimónia atu konfirma ema sira nia “status” no fatin iha eskala sosiál nia laran. Tan ne'e, ema ne'ebé organiza “festa han-hemu nian”, – n.e ba oan ida nia kazamentu – buka halo selesaun didi'ak konvidadu sira-nian: se iha festa iha prezensa ema ne'ebé la soi sei hatuun “status” família nian iha comunidade tomak nia oin; no, iha sorin seluk, ema importante sira nia prezensa hatudu sai família nia importánsia no onra.

### *MENSAJEN*

Aikanoik dahuluk kona-ba konvidadu sira ba festa “han-hemu” (vers. 1-10). Liurai ida organiza festa han-hemu atu selebra nia oan nia kazamentu. Nia konvida ema sira, maibé konvidadu sira lakohi partisipa iha festa “han-hemu”, hodi apresenta deskulpa oiain. Mateus to'o atu dehan katak sira oho tiha liurai nia manu-ain sira... Rekuza konvite mak ofensa boot liu; maibé, hanesan buat ne'e la to'o, konvidadu sira ne'ebé la soi hatudu desprezu ba liurai, hodi oho liurai nia atan sira. Liurai haruka nia tropa sira ne'ebé fó kastigu ba mahohok/assasinu sira (vers. 7. Referénsia ne'e la mosu iha Lucas... Ne'e mak karik interpretasaun ida destruisaun Jerusalém nian husi tropa sira Tito nian, iha tinan 70. Nune'e Mateus nia versaun hakerek depoizde data ne'e).

Maski nune'e, liurai rezolve mantein festa no haruka atu lori ba "festa" ema hotu hasoru iha lurón sira. Ema sira laho klase, ema "povu rai nian", ne'ebé nunka tuur iha meza ema importante nian (ho signifikaadu komuñau no lasu família no amizade nian), celebra festa iha liurai nia meza.

Maromak konvida Israel ba festa enkontru nian, komuñau nian, tempu mesiániku nian (oan nia kazamentu). Amlulik sira, eskriba sira, doutór sira Lei nian hakribi konvite no prefere kontinua kaer metin sira-nia eskema sira, sira-nia prekonseitu sira, sira-nia sistema auto-salvasaun nian. Nune'e, Maromak konvida ba Mesias nia "festa" ema maksalak no sira laho klase ne'ebé, tuir perspetiva teolojia ofisiál, dook husi komuñau ho Maromak no Reinu.

Aikanoik ne'e hatudu momoos Jesús rasik nia movimentu... Dalabarak, nia partisipa iha "festa han-hemu" nian ho ema sira laho klase eh la iha fama di'ak. To'o ninia inimigu sira akuza nia nu'udar "kaan-teen no hemudór tua, publikanu no ema maksalak sira nia belun" (Mt 11,19; Lc 7,34). Tanba sá mak Jezús partisipa iha "festa han-hemu sira", to'o hetan fama aat? Tanba iha Testamentu Tuan – hanesan ita haree iha leitura dahuluk –tempu mesiániku sira hetan deskrisaun ho "festa han-hemu" ne'ebé Maromak prepara ba povu hotu. Jezús konxiente katak, ho Nia, tempu sira-ne'e to'o ona; no utiliza senáriu "festa han-hemu" nian atu espresa realidade Reinu nian (meza festa nian, domin nian, komuñau nian ho Maromak, iha-ne'ebé ema hotu, mane no feto sira, laho esesaun, hetan konvite). Ba Jezús, tuur iha meza ho ema maksalak sira mak forma privilejiada atu dehan ba sira katak Maromak simu sira ho domin no hakarak estabese relasaun komuñau no familiaridade ho sira, hodi la ezklui ema ida husi Ninia konvíviu eh Ninia comunidade.

Líder sira Israel nian fali, la aprova Jezús nia kontaktu ho sala-na'in sira no sira ne'ebé la tama klase ida... Ba sira, publikanu no prostituta sira, n.e., la soi atu tama iha comunidade salvasaun nian. Halo sira tuur iha meza "festa" Reinu nian mak buat ruma absolutamente la apropiadu.

Provavelmente, aikanoik ne'e Jezús uza atu hatán ba ema sira ne'ebé akuza Nia atu konvida ema sira ne'ebé la merese ba "festa" Reinu nian. Jezús halo klaru katak, iha Maromak nia perspetiva, kestaun importante la'ós ema ida iha direitu eh lae atu tuur iha meza Reinu nian; maibé kestaun esensiál mak ema ida aseita eh la aseita Maromak nia konvite. Iha realidade, líder sira Israel nian rekuza Maromak nia dezafiu, enkuantu sala-na'in sira no ema sira ne'ebé la tama iha klase ida simu Nia ho liman nakloke.

Komunidade sarani, ikusmai, halo leitura foun diferente uitoan husi aikanoik no uza atu esplika tan sá mak ema jentiu sira simu di'ak liu Liafoun Di'ak Reinu nian duké judeu sira.

Aikanoik daruak mak aikanoik konvidadu nian ne'ebé apresenta an ba festa laho hatais festa nian (vers. 11-14). Liurai ne'ebé organiza "festa" haruka hasai nia husi sala festa nian.

Aikanoik ne'e sai adverténsia ida ba ema sira ne'ebé aseita Maromak nia konvite ba festa Reinu nian, adere ba Jezús nia proposta no simu Batizmu. Mateus hakerek iha finál sékulu I (tinan 80), bainhira sarani sira haluha tiha ona entuziazmu insiál no moris fiar ida ladún ezijente. Sira konsidera an halo ona opsau definitiva no katak aseguara ona salvasaun ba sira. Mateus dehan ba sira: kuidadu, tanba la to'o tama iha sala "festa han-hemu nian"; presiza mós hatais estilu ida moris nian ne'ebé tau iha prátika Jezús nia hanorin sira. Ema ne'ebé simu ona batizmu no adere ba "festa han-hemu" Reinu nian, maibé lakohi uza hatais domin nian, partilla nian, servisu nian, mizerikórdia nian, don moris nian no kontinua uza hatais egoízm nian, arrogánsia nian, orgullu nian, injustisa nian, labele partisipa iha festa enkontru no komuñau nian ho Maromak. Maromak bolu ema hotu, mane no feto sira atu partisipa iha "festa han-hemu"; maibé admite de'it ema sira ne'ebé hatán ba konvite no muda kompletamente sira-nia moris.